





c. 1870

Digitized by the Internet Archive  
in 2017 with funding from  
The Newberry Library





20363 15  
ADVERTISSEMENT

A LA FRANCE  
TOUCHANT LES  
LIBELLES QV'ON SEME  
CONTRE LE GOUVERNE-  
ment del'Estat.

*Dedié à Monsieur le President Icannin.*

Par le Sieur D. C.

---

M. D C. . . . .

THE NEWBERRY  
LIBRARY

X

Case  
F  
39  
. 326  
1615 adv

A MONSIEVR LE PRESIDENT  
Ieannin Conseiller du Roy en ses  
Conseils d'Estat, & priué & Con-  
trollieur general deses Finances.

M


MONSIEVR,  
Toute la France estant redevable de tant  
d'obligations à vostre prudence & à vos  
veilles continuelles quelle ne peut penser à  
sa felicité sans penser à vous, je serois ingrat si parti-  
cippât à ce bon-heur ie ne vous tesmoignoïs par quelque  
ressentiment combien je me tiens heureux de viure sous  
une Monarchie où la vertu d'un si grand homme est en si  
grande admiration que ses conseils sont reuerex comme des  
Oracles. Cest pourquoy, Monsieur, j'ay creu que ie vous  
deuoïs dedier ce discours d'Estat, comme à un des princi-  
paux Génies qui gouvernent cét Estat : Car soit que nous  
considerions le repos general du Royaume, où la tranqui-  
lité de nos fortunes particulieres, qu'est-ce autre chose que  
des effets des salutaires conseils que vous donnez à ceste  
grande & admirable Princeesse que l'amour quelle porte  
à nostre bien rend infatigable à toute sorte de tra-  
uaux ? Receuez donques, Monsieur, ce petit discours  
auec le mesme visage dont vous auez accoustumé de voir  
tout ce qui concerne la gloire de la Royauté; Vous  
protestant que comme cest auec un regret infny que l'im-  
pieté & l'ingratitude des mauuais françois ma donné sub-  
iect de l'escrire, c'est auec une extreme affection que ie  
me dis.

MONSIEVR,

Vostre tres humble & tres-  
obeissant seruiteur D. C.



*ADVERTISSEMENT*  
*à la France touchant les libelles*  
*qu'on seme contre le Gouvernement*  
*de l'Estat.*

 **Q**UAND ie considere par  
quels moyens miraculeux  
ceste grande & puissante  
Monarchie s'est plusieurs  
fois maintenuë contre les  
tempestes & les orages qui  
se sont esleuez pour la renuerser; il faut  
que i'aduouë que Dieu, protecteur des  
iustes Empires, à quelque soing particu-  
lier de nostre conseruation: Et certes,  
comme il est impossible de ne le voir  
point sans estre extremement aueuglez,  
aussi ne le pouuons-nous méconnoistre  
sans nous monstrier infiniment ingrats.  
Quelques coniurations qu'on ait faictes  
autresfois pour destruire ce Royaume:  
quelques artifices qu'on ayt practiquez  
pour degouster les peuples del'obeissan-  
ce qu'ils doiuent naturellement à leurs

Roy, & quelques ennemis estrangers ou domestiques qui l'aient assailly, on l'a bien pû voir esbranlé, mais on ne le vit iamais abatu: Au contraire, comme Antée reprenoit de nouvelles forces aussi tost qu'il touchoit la terre; il semble pareillement que cét Estat reprenne vne nouvelle vigueur au mesme temps qu'il paroist entierement ruiné.

Mais si on a veu reluire quelquesfois des tesmoignages extraordinaires de la faueur du Tout-puissant, ie puis dire avecques raison que ç'a esté depuis l'aduene-  
ment du Roy à la Courōne iusques à present: Car de quelle heureuse & profonde paix auons nous iouy malgré les efforts de deux ou trois factieux qui ne cherchent leurs felicitéz particulieres que dans les miseres publiques, & qui pensent estre oyssifs lors qu'ils ne conseillent rien contre le seruice du Roy? La Religion qui met les Sceptres en la main des Roys, qui les assiet sur les Throsnes, qui pose les Couronnes sur leurs testes, qui les oingt solennellement, qui rend leur pouuoir & leurs personnes inuiolables; La Religion dis je, qui affermit leur autorité sur des fondemens vraiment diuins, n'estant contee par ces homir

là qu'au rang des choses humaines, se faut  
il esmerueiller si du mespris de Dieu ils  
sont venus au mespris des Roys ? Mais  
quoy qu'ils s'efforcent encor maintenant  
de nous precipiter dans les abismes des  
mesmes miseres dont le bras victorieux  
de Henry le Grand nous a miraculeuse-  
ment deliurez ; quoy que ces prodiges  
de nature facent tout ce qu'il leur est pos-  
sible pour semer la diuision entre nous  
afin de s'agrandir de nostre ruine ; si leurs  
factions nous font craindre quelques si-  
nistres malheurs, n'auons nous pas occa-  
sion d'esperer de grandes felicitez, quand  
nous iettons les yeux sur vn ieune Roy,  
dont la vertu assistée des sages conseils  
de la Reyne sa mere, promet non seu-  
lement de restablir le Royaume en sa  
premiere splendeur, mais de le rendre aus-  
si plus heureux & plus fleurissant qu'il ne  
fut iamais ?

Il ny a sorte de moyens que n'aient re-  
cherchez ces perturbateurs du repos pu-  
blic : Il n'y a ressorts qu'ils n'aient essayé  
de faire iouer, ny artifice qu'ils n'aient  
employé pour faire reüssir leurs desseins  
pernicieux. La plus facile voye qu'ils  
se soient imaginee pour y paruenir, ça

esté de décrier l'administration des affaires par des libelles diffamatoires qui contiennent autant de crimes capitaux que de parolles, & dont les Autheurs, gens execrables & maudits, ne meritent pas moins que le feu. Voylà la meschanceté dont ils se seruēt pour alterer les volontez des peuples en descriant le gouuernement de l'Estat, & en faisant accroire aux simples que la France est reduite à l'extremité; comme si quand ces escripts seroient aussi veritables qu'ils sont calomnieux, c'estoit vn subiect legitime de secouer le ioug de l'obeissance que nous deuons à nostre Roy, auquel Dieu a donné le pouuoir de nous commander, comme il nous a commandé de luy obeir: C'est le pretexte ordinaire de ceux qui troublent les Estats: C'est par ces trompeuses amorces qu'on prend les foibles esprits: C'est en ces occasions que les gens de bien sont esprouuez & que les meschans sont recongneuz: Iamais on ne vit regne tant fust-il heureux qu'il n'y eust tousiours des personnes qui ne pouuoient supporter l'estat des affaires presentes: Cest vn vice attaché à nostre nature & non pas aux siecles: Iamais les hommes ne

font satisfaits de leur fortune quelque grande qu'elle soit : Nous nous imaginons tousiours les siècles passez plus innocents que l'aage ou nous viuons; & neantmoins nos peres ont accusé les temps que nous estimons auoir esté les plus heureux, & l'aage ou nous sommes que nous appelons iniustement l'aage de fer, sera quelque iour nommé l'aage d'or par la posterité. Il ne faut point doubter qu'il n'y ait eu des mal-contents souz le regne d'Auguste & de Trajan; sous celuy de Charlemagne & de S. Louys; il y en aura tant que le monde sera monde. C'est pourquoy on ne se doit point estonner des plainctes iniustes qu'on fait du gouuernement de l'Estat. Chacun sçait en quelle perplexité la France fut reduicte apres la mort tragique & lamentable de Henry le Grand; il sembloit que toutes nos ioyes & toutes nos prosperitez fussent terminees avecques sa vie; nous n'auions autres obiects deuant nos yeux que guerres, que batailles, que sieges & saccagemens de villes, que meurtres, que violemens, bref, que choses funestes a la veüe & à la pensée; il ny auoit insolence que les meschans n'esperassent de commettre impunément;

ny sorte d'outrages que les gens de bien ne craignissent ; toutefois la singuliere prudence de la Reyne a si dignement pourueu à tout ce qui estoit de nostre bié, quelle à conuertiy toutes nos craintes en esperances, tous nos pleurs en larmes de ioye, & toutes nos douleurs en contentements. De telle sorte, que nous auons esté guarantis non seulement de tous les malheurs presque fataux à la France durant la minorité de nos Roys; mais auons mesmes esté comblez de toutes les felicitez qu'un Estat peut receuoir sous la domination d'un Roy non moins iuste qu'absolu. Le repos que Henry le Grand nous auoit acquis par sa valeur victorieuse, la Reyne là conserué par sa conduite admirable, avec des succez si conformes à nos desirs, que nostre condition n'a point esté autre sous sa Regence, qu'elle estoit sous le regne du feu Roy; ou s'il y à eu quelque difference, cest en ce que nous auons esté plus heureux depuis cinq ans que nous n'estions auparauant; chose que ie puis dire avec aussi peu de flaterie que ie suis esloigné de la necessité de flatter; & toute la France m'en seruira de tesmoing. Car si l'on veu prendre la peine de  
regarder

regarder exactement de quelle façon le peuple a esté traicté depuis ce temps-là, ie m'asseure qu'il ne se trouuera personne qui ne confesse que nous debuions la tranquillité de ce Royaume à ceste Princeesse incomparable, & tout le bon-heur de nostre siecle à la pieté de ses mœurs.

La France est composee de trois ordres sous lesquels sont reduites toutes les conditions des subiects du Roy, excepté celles des Princes. De quelles nouuelles impositions à ton chargée les Ecclesiastiques depuis la mort de Henry le Grand, qu'ils aient eu subiect de se mescontenter de la Reyne? ne les a-telle pas cheries comme bons seruiteurs du Roy; & honoré mesmes, comme Pasteurs du peuple, & comme Ministres de Dieu? s'est il passé quelque occasion ou ils n'aient esté fauorablement traictéz? Quant à la Noblesse, outre quelle a esté maintenuë par le Roy en tous les priuileges, honneurs, & immunitéz qui luy ont esté concedees par les feux Roys ses predecesseurs; sa Maiesté ne s'est point contentee de l'esleuer aux principales charges du Royaume, mais la mesme gratiffiee d'une si grande quantité de pensions & d'appointements, qu'il

semble qu'à l'exemple d'Alexandre, elle ne se soit voulu réserver que l'esperance, & que comme ce genereux Romain qui refusa les presents des Samnites, elle ait mieux aimé commander aux riches que de posséder leurs richesses. L'affectiō naturelle qu'elle porte à la Noblesse n'estoit pas bornée de ces seules liberalitez : son dessein estoit d'oster la venalité des offices afin que les Gentils hommes pūssent parvenir par leur merite seul & par la grace du Prince aux dignitez des Magistratures: Voila par quelle reformation le Roy desiroit rendre remarquable la premiere année de sa maiorté : mais les remonstrances de tous les Officiers ont esté cause de faire sursoir l'execution d'un project si glorieux.

Quant au tiers estat, veu que dez le commencement de la Regēce de la Reyne, il fut soulagé de quatorze cens mille liures par an en vn seul article & sur le seul impost du sel, & deschargé en outre d'un nombre infiny de Commissions & de revocations d'Offices dont il estoit auparavant extremement trauaillé, qui est-ce qui pourra dire, sinon avec vn extreme tort, que cet Ordre non plus que les au-

tres ait eu subiect de se mécontenter? Vne  
des plus grâdes plaintes quel'on face, est  
del'administration des finances; mais ie  
puis dire qu'il y a long-temps qu'elles ne  
furent plus innocemment gouuernées  
que maintenant; aussi ne croy-je pas qu'il  
y ait persône qui en veuille accuser celuy  
qui en a le principal maniement, s'estant  
tousiours comporte en ceste charge  
auec vnetelle integrité, qu'il faict voir à  
tout le monde combien le deuoir de la  
conscience est plus puissant sur les gens  
de bien que toutes les richesses de la ter-  
re. Ie me contenteray doncques de dire  
que la saison que nous auôs passée ne per-  
mettoit pas qu'on en vlast autrement.  
Nous nous sommes veus en vn tēps me-  
nassé de tāt d'orages, que cōme ceux qui  
se treuuent en la mer durant quelque grā-  
de tourmente, sont quelques fois forcez  
de ietter leurs richesses au fonds de l'eau,  
afin de sauuer le Nauire; de mesmes ceux  
qui tenoient le timon de cet Estat, le  
voyants au danger d'estre perdu par les  
tempestes qui s'esleuent le plus souuent  
durant le basaage de nos Roys, ont esté  
contraints de faire des largesses extraor-  
dinaires pour euitier le naufrage de ce

grand vaisseau dans lequel les fortunes & les vies de tant de peuples sont enfermées. Voyla qu'elle a esté la cause de cette depense: Presque toute la Noblesse estoit tellement incommodée qu'il ne luy restoit plus que la vie quelle püst employer pour le seruice de son Prince: N'estoit-il pas donc raisonnable que le Roy la mist en tel estat qu'il en peust tirer du seruice & que ses ennemis en receussent de l'estonnement? Je ne doute point que cela ne semble repugner à la dignité d'un grand Monarque, d'achepter la paix de ses subiects: mais comme Alexandre osta le Diademe de sa teste pour bander & étancher la playe d'un ieune seigneur qu'il cherissoit extremement: tout de mesme les Roys qui veulent sauuer leurs Estats, sont quelquesfois contraincts de deposer leurs Courōnes par maniere de dire & de quicter ce qui est de leur autorité pour empescher les grandes effusions de sang qu'apportent les guerres estrangeres & ciuilles. Dōc à quel vsage plus necessaire pouuoit-on employer vne partie de l'argent que le feu Roy auoit laissé, qu'à la conseruation de la paix, attendu que c'est par la paix que les Roys regnent souuerai-

nement sur leurs peuples & que les peuples vivent heureusement sous leurs Roys ? attendu que c'est par la paix que les vertus sont en leur throne, les loix en vigueur, les Magistrats en autorité, le commerce libre par la terre & par la mer, l'innocence asseurée, la malice punie, la vertu recongneüe, les arts en leur lustre, les Villes en leur ornement, & les Monarchies en leur grandeur ? Combien sont plus pretieux les thresors des cœurs que des richesses ? Il n'y a point de difficulté qu'il ne soit tres-necessaire de retrancher vne grande partie des pensions, mais il y a d'autres choses qu'il faut faire auparavant. On nous menasse de s'opposer à la perfection du Mariage du Roy, de laquelle despend la paix du Royaume : il faut rompre les obstacles des plus importantes affaires avant que de pourvoir à celles qui sont de moindre consequence, & imiter les bons medecins qui guerissent les maladies les plus dangereuses, auparavant que de remedier à celles qui sont sans peril. Je sçay tres bien que plusieurs qui ne desirent que de voir la France dedans les mesmes calamitez ou elle estoit il n'y a pas long-tēps, fortiffiēt leur audace de l'esper-

râce qu'ils ont de voir le Parlemēt porté à  
 quelque desordre extraordinaire: mais  
 surquoy se fondent ils pour auoir si mau-  
 uaise opiniō d'une Cōpagnie en laquelle  
 on retrouueroit l'obeissance, quand elle  
 seroit morte en toutes les autres Cours  
 Souueraines? Nous auons veu comme  
 les subiects du Roy ont esté traictez;  
 voyons comme les Aliez ont esté entre-  
 tenus; car encore que la Royauté consiste  
 au pouuoir legitime que le Prince a sur  
 son peuple, neantmoins d'autāt que leurs  
 Estats sont subiects tant aux guerres estrā-  
 geres que ciuilles, il est besoing qu'ils fa-  
 cent des Alliances avecques les autres  
 Roys, Seigneuries & Potentats afin de les  
 rendre leurs amis ou d'empeschier qu'ils  
 ne soient leurs ennemis; c'est la raison  
 pour laquelle les confederations sont si  
 necessaires à tous Estats quelques grands  
 qu'ils soient, que pour en nier l'vtilité, il  
 faut auoir perdu tout iugement. Cela e-  
 stant posé comme vn fondement certain,  
 par quel moyen la Reyne laquelle en tous  
 ses desseings ne s'est proposée pour but  
 que l'honneur de Dieu, & le bien general  
 du Royaume, pouuoit elle mieux empes-  
 cher les troubles qui s'esleuent ordinaire-

ment en vne saison semblable à celle que nous ations passée, qu'en entretenant non seulement les anciennes Alliances de la Couronne, mais en obligeant aussi le Roy d'Espagne à tous les interets de la France par les mariages du Roy avecques l'Infante, & de Madame avecques le Prince d'Espagne ? n'estoit ce pas le seul moyen de retenir en leur deuoir par la terreur de ces deux puissances vnies, ceux à qui le mépris de la jeunesse du Prince pouuoit donner la hardiesse de troubler le repos publicq, ceux di-je qui dans leurs lettres publiées depuis trois iours parlent ouuertement des desseins du Roy, non comme subiects obeissants, mais cōme ennemis declarez ? Pouuoit-on avecques plus de prudēce empescher les entreprises tragiques de ces Hydres de rebelliō, de ces flā-beaux des guerres ciuiles, de ces hōmes detestables & pernicioeux qui ne nous troubleroient point maintenant & ne seroient point si temeraires, si le feu Roy n'auoit point esté si clement ?

Henry le Grand, Prince d'eternelle memoire, excusez moy si ie fais ceste reproche à vostre excessiue bonté, & pardonnez a la iuste douleur que ie ressēts de voir

l'autorité du Roy vostre cher fils & nostre souuerain Seigneur, trauersee par ceux que toutes sortes de deuoirs humains & diuins obligent plus estroictement a la conseruer: Pardonnez moy si ie me plains de vostre douceur & si ie detestel l'execrable impieté de ceux dōt l'ingratitude est si odieuse a tous les gens de bien qu'elle merite que la Iustice diuine élance la foudre pour les écrafer; que les abismes de la terre s'ouurēt pour les engloutir, & que toutes les puissances du monde s'arment pour les exterminer comme les pestes du genre humain.

Nos peres, ont veu des choses, bien estranges durāt leurs iours; mais virēt ils iamais riē de si prodigieux que ce que nous voyōs en nostre siecle? ô merueilleux chāgement de la volonté des hommes, qu'il faille que ceste Monarchie soubslaquelle nous viuons si tranquillement & si heureusement, soit maintenāt assaillie par ceux qui l'ont autrefois deffenduë, & que par vne mutation cōtraire elle soit maintenāt deffenduë par ceux qui l'ont autrefois assaillie! Se faut-il doncq émerueiller si les bons François se mettent en tel estat, qu'ils puissent reprimer l'audace de ceux qui

qui se veulent opposer à la volonté du Roy, & qui prennent pour specieux pretexte de leur reuolte, la fausse allarmie qu'ils reçoient de voir les deux plus puissants Roys de l'Europe vnis ensemble par des mariages si prudemment deliberéz, si solennellement promis, & si impatiemment attēdus des gēs de bien. Car tout ainsi que ceux de Lacedemōne eurent raison d'entrer en dēffiance des fortifications extraordinaires d'Athenes, se representans ce que pourroit faire ceste ville quād elle seroit rebastie, puis qu'elle entreprenoit de s'agrandir de la sorte estant ruinee? de mesme nous auons subiect de nous imaginer qu'elle seroit la hardiesse de ceux de la Religion pretenduēs ils auoient vne grande puissance, puisque nous les voyons si fiers & si temeraires en vne si grande foiblesse. Il n'y à rien qu'ils ne demandent si on leur accorde vnē fois, ie ne dy pas la rupture, mais la seule surseance de ces Mariages tāt necessaires à la paix de toute l'Europe. Il y à du peril & du deshonneur à leur octroyer ce qu'ils desirent; leur ambition n'a bornes quelconques; leurs passions n'ont iamais de mediocrité: leur humeur est tel-

le, que s'ils ne craignent eux mesmes ils se font craindre. Or si la principale fin des Mariages des Princes est l'vtilité de leurs peuples, nous ne pouuons pas tirer de ces Alliâces vn plus grand bien que la paix, qui est la mere de toute felicité. Aussi en receuons nous double fruit, en ce qu'elles nous garantissent des guerres estrangeres & ciuilles, par ce qu'elles retiennent nos voisins dans le deuoir des confederations qu'ils ont avec la Couronne, & font demeurer les mauuais François dans les bornes de l'obeissance. Les factions du Royaume nous ont reduits à tel point, que le bon-heur de cet Estat despéd du tout de la perfectiō de ces Mariages. Ceux que l'honneur & la conscience ne peuuent retenir dans leur deuoir, la crainte qu'ils ont del'vnion de ces deux Couronnes les y retient. C'est le subiet pourquoy quand ie considere qu'il en procede tant de fruits si salutaires à la Religion, si euidents à nos yeux, & si desirables à tous les gens de bien, ie m'estonne grandement de ce que l'on voit des hommes qui font profession d'estre Catholiques, & qui se disent amateurs de leur patrie & font neantmoins les mes-

mes desirs, & tiennent les mesmes discours que les aduersaires de la foy, & que les ennemis de la Monarchie & du repos de la France. Mauuais François que nous sommes, imprudens & dénaturez, plus barbares que ne sont les barbares mesmes, engeance sans pieté, sans amour, sans foy, sans conscience, sommes nous pas indignes d'auoir vn bon Roy, nous qui le voulons marier à nostre fantasie & le forcer en vne chose en laquelle seule on ne peut contraindre personne? ô malheureuse condition des Princes, si cela ne leur est pas permis qui est licite au moindre de leurs subiects! sommes nous pas bien ennemis de nostre salut, de rechercher nostre ruine? sommes nous pas bien rebelles de nous opposer à la volonté de nostre Roy? sommes nous pas bien iniustes de ressentir presentemēt par le repos ou nous viuons les effects merueilleux de ces Aliances, & d'en nier l'vtilité? Qu'est-ce que nous autres qui sommes éclairez de la cognoissance du vray Dieu, & qui nous vantons d'estre polis par les arts & par les disciplines pouuons plus reprocher à ces peuples qui habitent aux derniers bouts de la terre, & qui n'ont entre eux n'y poli-

ce ni religion ? peut-on pas dire iustement de nous ce qu'on a dict autresfois del'impieté des mœurs de la Grece, que l'ignorance des vices est plus vtile aux barbares que n'est à nous autres la cognoissances des vertus?

Tout ainsi donc que l'on attache avec des chaines plus fortes les animaux les plus fiers & les plus puissants comme les lions, que ceux qui sont d'une nature plus douce & plus sociable: de mesme la raison veut que nous tenions le Roy d'Espagne attaché à l'alliance de ceste Monarchie, avec des liens plus forts & plus estroicts, que ceux dōt nous sommes vnis avecques les autres Roys, attendu qu'il est tousiours vtile des'allier avec vn Prince, quand il est dangereux de n'en estre pas allié. Qui se peut donc offenser qu'iniustement, que le Roy comme pere de son peuple recherche le bien de son peuple, & procure la conseruation de l'Eglise, comme ayant l'hōneur d'estre Fils Aîné del'Eglise, comme ayant esté instruit en l'Eglise, comme ayant receu le Sceptre & la Couronne dans l'Eglise? FRANCE, ma chere Patrie que depuis vne si longue suite de siecles & de Roys, Dieu a perpetuellement con-

seruée contre tant d'ennemis qui t'ont assaillie, & qui maintenant reposes si doucement sous le regne d'un ieune Roy conseillé par vne grande Reyne, qui ne respire que l'honneur de Dieu & que ta fœlicité, sois sage par tes dommages passez, & ferme l'oreille à tous ces faux bruits que les ennemis de ton repos fement dans tes villes & dans tes Provinces, afin que tu tournes encore tes armes contre tes propres entrailles, que les peres trempent leurs mains de rechef dans le sang de leurs enfans, que les freres s'arment contre les freres, les beaux-peres contre les gendres, les parents contre les parents, & que le iuste courroux de Dieu te face seruir d'un particulier exemple de calamité pour estonner tout le genre humain. Et toy P A R I S, la Ville capitale de la France, le sejour ordinaire de nos Roys, l'abord de toutes les nations, la retraite des grands esprits, l'ornement de l'Estat, & le centre de toutes les richesses de l'Vniuers: Paris que le feu Roy Henry le Grand a honoré de tant de belles immunités, enrichie de tant de biens, illustrée de tant de marques de pieté, & ornée de tant de grands & magnifiques bastiments

que d'un desert que tu estois durant la guerre ciuile, il en a faict la plus riche, la plus populeuse, la plus auguste, & la plus celebreville de toute la terre, resouuiens-toy incessamment des bien-faicts de ce grand Monarque; recognoy son image & ses vertus en la personne de ton Roy son successeur; tourne les yeux sur luy comme sur l'Astre de l'influence duquel tu dois attendre tout ton bon-heur; represente-toy qu'une grande ville n'est iamais en plus grand danger que quand elle est en une si eminente prosperité, qu'est celle ou la paix t'a faict paruenir? C'est lors que la felicité l'aveugle ordinairement, que la fortune la trompe, que la presumption l'emporte, & luy done l'audace d'entreprendre des desseins qui la ruinent à la fin? Imagine-toy tousiours que tant plus une ville est opulente, & plus elle a besoin de protection; que plus sa fortune est grande & plus elle est enuiee, & que c'est lors que les autres villes jalouses de ses richesses ne font qu'attendre qu'elle manque a son deuoir, pour la destruire, & pour triompher de ses despouilles: Resouuiens-toy du temps que ta rebellion prouoqua l'ire de Dieu, & que la fureur de la guerre qui

abbatoit tes habitans comme la moisson  
d'une campagne, ne te faisoit pas tant de  
mal par dehors que t'en faisoient par dedans,  
la peste, la famine, & les tyrans domesti-  
ques dont la rage ne pardonnoit pas mes-  
mes au pourpre des Magistrats: N'oublie  
iamais que c'est la benedictiõ de tõ Roy,  
& le merite de ton obeissance qui te cõ-  
blẽt d'hõneurs & de biẽs; & qui fõt qu'au  
lieu de la foudre du Ciel la manne tombe  
dessus toy, que tu vois l'abondance au  
lieu de la famine, la paix au lieu de la guer-  
re: bref, pense tousiours qu'il ny a sorte  
de graces que tu ne doiues esperer en de-  
meurant constamment en ton deuoir, ni  
malheur que tu ne doiues craindre lors  
que tu t'en esloigneras.

F I N.

